

JONES, JOSEPH DAVID (1827 - 1870), athro a cherddor

Enw: Joseph David Jones

Dyddiad geni: 1827

Dyddiad marw: 1870

Priod: Catherine Jones (née Daniel)

Plentyn: D. Lincoln Jones

Plentyn: Henry Haydn Jones

Plentyn: Owen D. Jones

Plentyn: John Daniel Jones

Rhiant: Catherine Jones

Rhiant: Joseph Jones

Rhyw: Gwryw

Galwedigaeth: athro a cherddor

Maes gweithgaredd: Addysg; Cerddoriaeth

Awdur: Robert David Griffith

Ganwyd yn 1827 yn Brynchrugog, plwyf Llanfaircaereinion, Sir Drefaldwyn, mab Joseph a Catherine Jones. Gwehydd oedd y tad, a phregethai gyda'r Wesleaid. Yn 14 oed mynychai Joseph gyfarfod canu a gynhelid yn Nolanog, rhyw ddwy filltir o'i gartref. Dangosodd y tad wrthwynebiad mawr iddo fynd i'r cyfarfodydd canu, ac ni allai oddef iddo golli ei waith gyda cherddoriaeth. Symudodd y teulu i Pantgwyn ger Llanfaircaereinion a chafodd well cyfleusterau i ddysgu cerddoriaeth yno. Anrhegwyd ef â sielo a dysgodd ei chwarae yn lled dda. Dechreuodd gyfansoddi tonau, a chyn bod yn 20 oed dug allan *Y Perganiedydd*, casgliad o donau; trodd yr anturiaeth allan yn llwyddiant ariannol. Wedi colli ei fam gorfu iddo gefnu ar ei gartref, ac aeth i Dywyn, Meirionnydd, i ofalu am un o'i gyd-ysgolheigion a oedd yn wael ei iechyd. Ar gais nifer o gyfeillion agorodd ysgol yno, a bu yno yn llafurio gyda cherddoriaeth am dair blynedd. Cynhaliai ysgolion canu bob wythnos yn Nhywyn, Aberdyfi, Llanegryn, a Brynchrug. Aeth am chwe mis o addysg i Goleg Hyfforddiadol Borough Road, Llundain, a dychwelodd yn ôl i Dywyn. Yn Hydref 1851 penodwyd ef yn athro yr Ysgol Frutanaidd. Yn Ionawr 1860 priododd Catherine Daniel, Caethle, Tywyn. Yn 1865 rhoddodd ei swydd i fyny yn yr Ysgol Frutanaidd, a sefydlodd ysgol ramadeg breifat yn Clwyd Bank, Rhuthyn.

Gwnaeth gyfraniad gwerthfawr i gerddoriaeth Cymru. Enillodd yn eisteddfod Bethesda, 1853, am gyfansoddi anthem, 'Ymddyrrcha, O Dduw,' a chafodd wobrwon mewn amryw eisteddfodau eraill. Cyfansoddodd lawer o ganeuon, anthemau, a thonau, a chyhoeddodd *Y Cerub*, casgliad o donau ac anthemau; *Cydymaith y Cerddor*; *Y Delyn Gymreig*; *Caniadau Bethlehem*; *Alawon y Bryniau* (gyda'r alawon hyn y denwyd Cymru oddi wrth y baledi, ac yr arloeswyd y ffordd i ganeuon [Dr. Parry, R. S. Hughes](#), a [William Davies](#)); *Cyfrol o Anthemau*; *Cantawd Llys Arthur*. Golygodd, gyda '[Tanymarian](#),' *Llyfr Tonau ac Emynau*, 1868; arno ef y disgynodd y gwaith mwyaf - treuliasai bedair blynedd yn casglu, dethol, a chynganeddu'r tonau. Yn

1868 hefyd cyhoeddodd ef a '[Tanymarian](#)' *Casgliad o Gorganau*. Trefnodd a golygodd gasgliad arall o donau ac anthemau, at wasanaeth y Wesleaid, a chyhoeddwyd y llyfr yn 1872. Bu ei ganeuon yn boblogaidd, ac erys 'Capel y Ddol' a thonau eraill o'i waith yn boblogaidd. Bu farw 17 Medi 1870 a chladdwyd ef ym mynwent y Bedyddwyr, Rhuthyn.

Awdur

Robert David Griffith, (1877 - 1958)

Ffynonellau

Y Gwyddoniadur Cymreig (1889–96), x, 624

Y Cerddor, 1870, 78, 85; Mawrth a Mai 1893, Ebrill 1910

M. O. Jones, *Bywgraffiaeth Cerddorion Cymreig* (1890)

NLW MSS 7340, 8294-6, 9497

Darllen Pellach

J. D. Jones, *Three Score Years and Ten: the Autobiography of J.D. Jones* (London 1940)

Lyn Davies, 'Jones, Joseph David (1827-70)', *Cydymaith i Gerddoriaeth Cymru* (Talybont 2018), t.285

Dolenni Ychwanegol

Archifau LIGC: [J. D. Jones Manuscripts](#)

Archifau LIGC: [Papers relating to Joseph David Jones](#)

VIAF: [48724037](#)

Wikidata: [Q6282491](#)

Dyddiad cyhoeddi: 1953

Hawlfraint Erthygl: <http://rightsstatements.org/page/InC-RUU/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

